

## Morning Regional Dogri News Bulletin, 27 August 2024

मार्निंग डोगरी न्यूज़ बुलेटिन, समें. 09.20 Hrs

<><><><><><>

### Headlines

- जम्मू-कश्मीर विधानसभा चुनाएं दे पैहले गेड़ तैहत नामांकन भरने दा अज्ज खीरी दिन, एन.सी, कांग्रेस ते बीजेपी नै मेदवारें दी पैहली सूची जारी कीती।
- प्रधानमंत्री नरेंद्र मोदी होर जम्मू-कश्मीर च होने आले विधानसभा चुनाएं दे प्रचार अभियान दी अगुवाई करंगन।
- विधानसभा चुनांs 2024 दी तैयारिएं दा आम ते पुलस निगरानें आस्सेया जायजा लैता गेआ।
- भारत ते अमरीका नै यूक्रेन ते बांग्लादेश दी स्थिति पर चर्चा कीती।

<><><><><><>

### Nomination

जम्मू-कश्मीर च होने आले विधानसभा चुनाएं दे पैहले गेड़ तैहत नामांकन भरने दा अज्ज खीरी दिन ऐ। इस गेड़ तैहत विधानसभा दी कुल 24 सीटें पर 18 सितंबर गी मतदान होना ऐ। नामांकन पत्रें दी जांच आला कम्म कल कीता जाग। मेदवार जेकर चाहन तां 30 अगस्त तगर अपना ना वापस लेई सकदे न। दुए गेड़ तैहत मतदान 25 सितंबर ते त्रीए गेड़ तैहत मतदान पैहली अक्टूबर गी होग।

वोटें दी गिनतरी आला कम्म 4 अक्टूबर गी कीता जाग। जम्मू-कश्मीर च कुल 87 लक्ख 9 ज्हार मतदाता न जिंदे चा 44 लक्ख 46 ज्हार मर्द, 42 लक्ख 62 ज्हार महिलां ,3 लक्ख 71 ज्हार पैहली बारी आले मतदाता, 20 अशारिया 7 लक्ख थ्वां युवा मतदाता न। कुल 90 विधानसभा हल्के चा 74 सामान्य, 7 एस.सी लेई ते 9 एस.टी मेदवारें लेई आरक्षित न।

<><><><><><>

### Parties-List

कांग्रेस पार्टी नै प्रदेश च होने आले चुनाएं लेई 9 मेदवारें दी सूची जारी कीती ऐ। पार्टी नै गुलाम मोहम्मद मीर होरें गी डुरू विधानसभा सीट थ्वां जिसले कि शेख रियाज होरें गी डोडा थ्वां मेदवार बनाया गेआ। पार्टी नै प्रदीप कुमार भगत होरें गी डोडा पच्छम थ्वां अपना मेदवार तय कीता ऐ। एह घोषणा एन.सी ते कांग्रेस बश्कार सीटें दे बंटवारे गी लेइए होई दी गल्लबात मगरा आई ऐ। नेशनल कांफ्रेंस ते कांग्रेस नै बिलतरतीब 51 ते 32 सीटें पर चुनां लइना तय कीता ऐ। भारतीय जनता पार्टी नै 16 मेदवारें दी पैहली सूची जारी करी दिती ऐ। इस सूची च सैइद वजाहत, जी..एस राणा ते जावेद अहमद कादरी शामिल न। इनेंगी बिलतरतीव अनंतनाग, डोडा ते शोपियां सोयां मेदवार बनाया गेआ ऐ। रामबन थ्वां राकेश ठाकुर होर चुनां लडंगन। सलीम भट्ट बनिहाल थ्वां ते शक्ति राज परिहार डोडा पच्छम थ्वां मेदवार बनाए गए न। एहदे थ्वां पैहले भारतीय जनता पार्टी नै 44 मेदवारें दे नाएं दी सूची जारी कीती ही। इस सूची गी मगरा परताई लैता गेआ।

<><><><><><>

## PM-Modi

प्रधानमंत्री नरेंद्र मोदी होर जम्मू-कश्मीर च होने आले विधानसभा चुनाएं च पार्टी दे चुनां अभियान दी अगुवाई करंगन। अगस्त 2019 च केंद्र शासित प्रदेश बनने मगरा पैहली बारी चुनां होआ रदे न। गृह मंत्री अमित शाह, रक्षा मंत्री राजनाथ सिंह, भारतीय जनता पार्टी दे राश्ट्रीय अध्यक्ष जे.पी.नड्डा, उत्तर प्रदेश दे मुखमंत्री योगी आदित्यनाथ होर बी 40 स्टार प्रचारकें दी सूची च शामिल न। एह सारे बड्डे नेता जम्मू-कश्मीर च पार्टी ते पार्टी दे मेदवार लेई चुना प्रचार करंगन।

<><><><><><>

## Ramban-Election

54-रामबन ते 55 बनिहाल दे विधानसभा हल्कें दे आम निगरान हिमांशु कुमार राय होरे पुलस निगरान कुनाल अग्रवाल हुंदे कन्नै जिले च आजाद, निर्पक्ख ते पारदर्शी चुनां यकीनी बनाने लेई कीती जा रदी तैयारिं दा जायजा लैता। इनें निगरानें प्रमुख थाहरें दा जायजा लैता ते कीते जा'रदे इंतजामें दा मौके पर जाइए निरीक्षण कीता। रामबन दे जिला चुनां अधिकारी बसीर उल हक चौधरी होरें स्ट्रांग रूम, हर रोज 24 घैंटे कम्म करने आले चुनां सरबंधी नियंत्रण कक्ष, मतदान केंद्रें, ट्रांसपोर्ट योजना, ई.वी.एम, अमला ते मतदाताएं लेई सुविधा ते होरनें दुएं इंतजामें बारे व्यापक जानकारी दिती। निगरानें आस्सेया आपूं चै नेइमा तालमेल बनाई रक्खने ते इक टीम आला लेखा कम्म करने लेई सब्बनें पर जोर पाया गेआ।

<><><><><><>

## Ramban-Election

औंदे विधानसभा चुनाएं दे मद्देनजर इलेक्ट्रानिक वोटिंग मशीनां सख्त सुरक्षा बंदोबस्तें हेठ पुंछ दे मिनी सचिवालय च पजाइयां गेइयां न। इस मौके पर रिटर्निंग अफसर, बक्ख-बक्ख सियासी पार्टिं दे नुमाइंदे मौजूद हे। एहदा मकसद सारे सरबंधी दिशा-निर्देशें दी पालमा ते उंदी सुरक्षा गी यकीनी बनाना हा। हुन इनें ईवीएम गी सख्त सुरक्षा बंदोबस्तें हेठ रक्खेआ गेआ ऐ ते इंदी सीसीटीवी कैमरे राएं निगरानी बी कीती जा रदी ऐ। इत्थे दुए मरहले च यानि 25 सितंबर 2024 गी चुनां होना ऐ। वोटें दी गिनतरी आला कम्म 4 अक्टूबर गी कीता जाग। इस गेड लेई अधिकारिक अधिसूचना 29 अगस्त गी जारी कीती जाग। नामांकन भरने दी खीरी तरीक 5 सितंबर होग। मेदवार जेकर चाहन तां अपना नां 9 सितंबर तगर वापस परताई सकदे न।

<><><><><><>

## Udhampur-Election

उधमपुर जिले च स्वीप कार्यक्रम तैहत इक सराहनेजोग पैहलकदमी राएं उधमपुर थमां पत्नीटॉप तगर बाइक रैली दा आयोजन कीता गेआ। एह आयोजन उधमपुर दी जिला चुनां अधिकारी सलोनी राय ते उधमपुर दे युवा सेवा ते खेड्ड सरबंधी अफसर रोमेश चंद्र मिश्रा हुंदी अगुवाई च कीता गेआ। लोकें च चुनाएं बारै जागरूकता फैलाने दे मकसद कन्नै 60 बाइकें पर स्वीप बैनर लाए गेदे हे जिनें लोकें च जागरूकता फैलाई। इस कार्यक्रम च लोकें बदी चढ़िए हिस्सा लैता।

<><><><><><>

## PM-Modi US

प्रधानमंत्री नरेंद्र मोदी होरें यूक्रेन च स्थिति सने कुल संसारी ते इलाकाई मसले बारे कल्ल अमरीका दे राष्ट्रपति जो बिडेन हुंदे कन्नै टेलीफोन उप्पर गल्लबात कीती। श्री मोदी होरें गी अमरकी राष्ट्रपति हुंदा फोन आया जेदे दौरान प्रधानमंत्री मोदी होरें भारत ते अमरीका बशकार व्यापक कुल संसारी सामरिक सांझ-भ्याली प्रति राष्ट्रपति जो बिडेन हुंदी बचनबद्धता गितै सराहना कीती। एह सांझ-भ्याली लोकतंत्र दे सांझे मूल्यें, कन्नू बवस्था ते लोकें-लोकें बशकार तगड़े संपर्क उप्पर आधारित ऐ। दौने लीडरें दपक्खी सरबंधें च प्रगति बारै जायजा लैता ते आखेआ जे भारत ते अमरीका बशकार सांझ-भ्याली दा मकसद दौने मुख्यें दे लोकें दे कन्ने-कन्ने समूलची मानवता गी फायदा पजाना ऐ। दौने लीडरें बांग्लादेश च बनी दी स्थिति बारै बी चेंता जाहर कीती। उनें बांग्लादेश च कन्नू बवस्था परतिये बहाल होने, अल्पसंख्यकें खास करिये हिंदुएं दी सुरक्षा यकीनी बनाने पर जोर दिता। उनें क्वाड सने होरनें मंचें उप्पर साथ-सहयोग गी होर तगड़ा करने दी बचनबद्धता गी फही दोहराया।

<><><><><><>

## Dr. Jatindra Singh

विज्ञान ते प्रौद्योगिकी केंद्री मंत्री डाक्टर जतिंद्र सिंह होरें आखेआ ऐ जे प्रधानमंत्री नरेंद्र मोदी हुंदी नमी जैव आर्थिक नीति करी औने आहले बरे च भारत इक अगुआ मुख्य होग। जतिंद्र सिंह होरें नमी दिल्ली च नमी जैव आर्थिक नीति गी संबोधित करदे होई आखेआ जे देशे दी जैव अर्थ बवस्था च बाददा होआ ऐ।

एह बाददा 2014 दा 10 अरब अमरीकी डालर थमां बधियै 2024 च 130 अरब डालर तगर पुज्जी गेआ ऐ। उनें इब्बी आखेआ जे इस नीति कन्ने जैव आधारित उत्पादें दे विकास ते रोजगार पैदा करने च बी मदाद हासल होने दी मेद ऐ।

<><><><><><>

### National Task Force

मेडिकल पेशे कन्ने जुड़े दे कर्मिणं दी सुरक्षा, उंदे कम्मकाज दी स्थितिणं दे सरबंधें च सिफारिशें गी करने लेई सुप्रीम कोर्ट दी पेठा खडेरी गेदी राश्ट्रीय कार्यबल दी अज्ज पैहली बैठक होग। सूत्रें मुजब एह बैठक नमीं दिल्ली च होग। भारत सरकार दे कैबिनेट सचिव बैठक दी प्रधानता करंगन। केंद्री गृह सचिव, राश्ट्रीय चिकित्सा आयोग दे अध्यक्ष सर्जन वाइस एडमिरल आर. सरीन, अखिल भारतीय आयुर्विज्ञान संस्थान दे डरैक्टर डॉ. एम. श्रीनिवास ते एम्स दे न्यूरोलाजी दिआं साबका प्रो. डॉ. पदमा श्रीवास्तव इस कार्यबल दे मिम्बरें च शामिल न। सुप्रीम कोर्ट नै इस कार्यबल गी त्रै हफ्तें दे अंदर अपनी अखीरी मुकदी रिपोर्ट ते 2 म्हीने दे अंदर अपनी खीरी रिपोर्ट पेश करने दा निर्देश दिता हा।

<><><><><><>

### SVEEP-Ramban

रामबन दे जिला प्रशासन नै जिला चुनां अधिकारी बसीर उल हक चौधरी हुंदी अगुवाई च कल 55 बनिहाल विधानसभा हल्के दे इक दूर दरेडे लाहके दे सरकारी हायर सेकेंडरी स्कूल महु च स्वीप जागरूकता कार्यक्रम दा आयोजन कीता।

इस कार्यक्रम का आयोजन जिला स्वीप टीम ने कीता जेदे च सहायक नोडल अधिकारी मनजीत सिंह, अब्दुल हमीद, सूरज प्रकाश ते तकनीकी टीम दे मिम्बर राज सिंह शामिल हे। स्वीप तैहत सरकारी हायर सेकेंडरी स्कूल खारी च बी इस चाल्ली दे जागरूकता कार्यक्रम का आयोजन कीता गेआ तां जे लोकें गी उंदे वोटें दे महत्व बारे जागरूक कीता जाई सकै। इनें कार्यक्रमें का मकसद औंदे विानसभा चुनावं लेई लोकें दी मती भागीदारी गी यकीनी बनाना ऐ।

<><><><><><>

### S.Jaishankar

विदेश मंत्री डॉ. एस जयशंकर ते ब्राजील दे विदेश मंत्री माउरो विएरा अज्ज नमीं दिल्ली च भारत-ब्राजील दे सांझे कमीशन दी 9मीं बैठक दी सह अध्यक्षता करंगन। विदेश मंत्रालय नै आखेआ ऐ जे श्री विएरा हुंदी जातरा कन्नै भारत ते ब्राजील बश्कार रणनीतिक सांझेदारी गी होर बढ़ावा थहोग। मंत्रालय नै आखेआ जे डा. जयशंकर ते विएरा होर दस्संगन जे त्रोंइका दे रूपै च किस चाल्ली दौनें मुख्य रलियै पिछले बरे भारत दी अध्यक्षता च जी-20 सम्मेलन दे मुख-मुख नतीजें दी दिशा च अगगे बदी सकदे न।

<><><><><><>

### Basohli-Festival

संस्कृति मैहकमे दे प्रमुख सचिव सुरेश कुमार गुप्ता होरें 10 थमां 12 अक्टूबर 2024 तगर होने आहले औंदे बसोहली महोत्सव दी तैयारियें का जायजा लैने आस्ते बसोहली का दौरा लाया।

प्रमुख सचिव हों मकामी प्रशासन ते लोकें कन्नै इक बैठक लाई जेदे च प्रतिनिधियें इस कार्यक्रम गी सफल बनाने आस्तै लोकें दी भागीदारी दे महत्व उप्पर जोर भरेया। इस महोत्सव च सांस्कृतिक कार्यक्रम पेश कीते जांगन जिंदे च परम्परागत गीत, नृत्य, कला, प्रदर्शनी ते शिल्पकला दी प्रदर्शनी शामिल न। इस महोत्सव च मकामी कारीगरें ते कलाकारें गी अपनी प्रतिभाएं दा प्रदर्शन करने लेई इक मंच उपलब्ध करोआया जाग जेदे कन्नै इस खेतर दे आर्थिक विकास च बाद्दा होग।

<><><><><><>